



KOMUNIKADO DI PRENSA 2017-002

Kambionan fundamental ta nesesario pa mehorá merkado laboral di Kòrsou i Sint Maarten di un manera duradero

WILLEMSTAD/ PHILIPSBURG – Den su mas resien boletin di kuartal, Banko Sentral di Kòrsou i Sint Maarten ta remarká ku a konsekuensia di e kresementu ekonómiko debil di e union monetario durante e último añanan, e tasa di desempleo na tantu Kòrsou komo Sint Maarten ta relativamente haltu. Partikularmente, e tasa di desempleo hubenil ta haltu.

Aktualmente tantu Kòrsou komo Sint Maarten tin oportunitatnan úniko pa por realisá un tasa di kresementu mas fuerte. Sinembargo, e kresementu aki solamente lo benefisiá henter komunidad si e forsa laboral ta poseé e kualidatnan rekerí riba merkado laboral. Pa e motibu ei medidanan pa mehorá merkado laboral di un forma duradero i redusí desempleo mester tin un prioridat haltu riba e programa di maneho di e gobièrnunan nobo di ámbos pais.

Ya ku un oumento di produkshon por lo general ta resultá den un bahada di desempleo, gobièrnunan di ámbos pais mester enfoká riba maneho ku ta stimulá kresementu ekonómiko riba tèrmino kòrtiku. Sinembargo, riba tèrmino largu mester bini kambionan fundamental pa mehorá merkado laboral di un forma duradero. Den e kuadro aki mester pone atenshon riba e maneho vigente i e institushonnan ku tin un efekto riba funshonamentu di merkado laboral, oumento di produktivitat i oumento di kupo di trabou. Por ehèmpel, tantu na Kòrsou komo na Sint Maarten mester mehorá e sistema di enseñansa pa hóbennan por tin mihó oportunitat na momento ku nan subi merkado laboral. Ademas, estudio di fishi pa desaroyá e abilidad rekerí riba merkado laboral ta importante. Tambe mester evaluá efektivitat di protekshon di merkado laboral, e sistema di sueldo mínimo i leinan di pèrmit di trabou. Si ta nesesario mester ahustá esakinan pa krea un mihó balansa entre protekshon di e trahadó i kompetitividad di ekonomia.

E teksto integral di e Boletin di kuartal ta disponibel riba wèpsait di CBCS, www.centralbank.cw/qb-2016-3

Willemstad, 1 di mart 2017

CENTRALE BANK VAN CURACAO EN SINT MAARTEN